

Cellesyklus som terapeutisk angrepspunkt

Samandrag

Bakgrunn. Når celler prolifererer, går dei gjennom ein definert sekvens av molekylære prosessar som vi kallar celledelings-syklus. Cellesyklus blir driven av kjerneproteinar med enzymaktivitet, syklinavhengige kinasar. Ein syklinavhengig kinase er aktiv berre når den er bunden i kompleks med sitt spesifikke syklin. I celledelings-syklus er det to kontrollpostar kor prosessen kan stoppe opp ved at spesifikke celledelingsinhibitorar eller andre enzymprotein blir aktiverte dersom det har skjedd skade på DNA. Den prolifererande cella får såleis tid til å ta konsekvensen av DNA-skaden, enten i form av å sette i gang DNA-reparasjon eller å aktivere celledødsmaskineriet. Desse kontrollpostane representerer også angrepspunkt for biologisk retta terapi ved kreftsjukdom.

Materiale og metode. Vi samanlikna effekten av strålebehandling på tumorceller med intakt og defekt funksjon av kontrollposten som styrer celledelingsprosessen.

Resultat. Tumorcellene responderte på DNA-skade påført av strålebehandlinga ved å stanse opp progresjonen i celledelings-syklus, men denne forsvarsresponsen kravde at kontrollposten forut for celledeling var funksjonell. Vi kunne overstyre forsvarsresponsen ved å behandle tumorcellene med ein droge som hemmar signalaktiviteten i kontrollposten.

Talking. Ei rekke farmakologiske agensar som er vist eksperimentelt å modulere celledelings-syklus er for tida i tidlegfase i klinisk utprøving, og desse kan ha terapeutisk potensial for å strålesensitisere tumorceller ved konvensjonell terapi.

Engelsk sammendrag finnes i artikkelen på www.tidsskriftet.no

Oppgitte interessekonflikter: Ingen

Anne Hansen Ree

a.h.ree@medisin.uio.no

Onkologisk avdeling

og

Tumorbiologisk avdeling

Det Norske Radiumhospitalet

0310 Oslo

Innan det onkologiske fagfeltet har vi dei seinare åra komme relativt langt i å implementere viktige prinsipp frå basalbiologi i terapeutisk medisin. Prosessane som styrer tumorvekst og metastasering er etter kvart godt karakteriserte, og danner såleis grunnlag for å intervensere i sjukdomsprosesser på ein biologisk relevant måte.

Intensjonen med denne artikkelen er å nytte celledelings-syklus til å eksemplifisere translasjonskonseptet innan kreftterapi, som etter mitt syn i stadig større omfang er biologisk fundamentert. Molekylærbiologiske mekanismar som ligg til grunn for terapeutisk effekt i klinisk stråleterapi illustrerer dette.

Tumorcelleproliferasjon – celledelings-syklus

Celledelings-syklus er som basalbiologisk omgrep tidlegare omtala i Tidsskriftet (1, 2). Dei aller seinaste åra har det komme mykje ny kunnskap som kompletterer vår forståing av denne biologiske prosessen og som ikkje minst opnar for nye terapeutiske intervensjonsstrategiar som no gjennomgår kliniske utprøvingar (3–5).

Celledelings-syklusfasane

Når cella prolifererer, går ho gjennom ein definert sekvens av molekylære prosessar som har fått namnet celledelings-syklus (fig 1). I prinsippet består celledelings-syklus av ein fase der alt DNA blir replikert (syntetisert – S-fasen) og ein mitosefase (M-fasen) som resulterer i to identiske dotterceller som får kvar sin like del av arvestoffet etter celledeling. Vekslinga mellom S-fase og mitose blir styrt av to regulatoriske celledelings-syklusfasar, G₁- og G₂-fasen (gap 1 og 2).

Gasspedalane i celledelings-syklus

Celledelings-syklusprosessen blir driven framover av kjerneproteinar med enzymfunksjon, som ber fellesnamnet syklinavhengige kinasar (cyclin-dependent kinase, cdk). Desse er alltid til stades i cellekjerna, og deira enzymaktivitet må såleis nøye regulast. Derfor er desse kinasane enzymatisk aktive berre når

dei kan danne kompleks med spesifikke syklinar. Syklinane blir syntetiserte i definerte intervall av celledelings-syklus og raskt brotne ned att. Såleis eksisterer syklin D tidleg og syklin E seint i G₁-fasen og berre da, mens syklin A og syklin B opptre i bestemte intervall av dei andre celledelings-syklusfasane (fig 1).

På denne måten regulerer syklinane framdrifta av celledelings-syklus. Visse typar vekststimuli, som til dømes vekstfaktorar som aktiverer tumorvekst, verkar mellom anna ved å stimulere cella til å danne syklin D. Dette fortel tumorcella at ho må starte prosessen med å dele seg.

Celledelings-syklusaktivitet i G₁-fasen

Ein syklinavhengig kinase er, som andre kinasar, eit enzym som fosforylerer målprotein sitt for at det skal endre funksjon. Når cella mottek ein vekststimulus, vil såleis dei aktiverte cdk/syklinkompleksa i G₁-fasen auke fosforyleringsgraden av retinoblastomprotein (pRB). Og når pRB er sterkt fosforylert, sit det så mange fosfatgrupper der at det ikkje lenger er plass til transkripsjonsfaktoren E2F, som derfor blir frigjort. Denne frigjeringsen er ein føresetnad for at cella skal kunne forlate G₁-fasen og gå over i S-fasen (fig 1).

Celledelings-syklusaktivitet i G₂-fasen

Den G₂-fasespesifikke syklinavhengige kinasen blir i litteraturen som oftast omtala som cdc2. Cdc2-kinasen må danne kompleks med syklin B for å bli aktiv, og dette enzymkomplekset er fosforylert i tidleg G₂-fase. Men før cella kan gå inn i mitose, må denne fosforyleringa av cdc2/syklin B-komplekset fjernast. Dette skjer ved hjelp av fosfatasen cdc25C (fig 1). Ein fosfatase er altså eit enzym som defosforylerer målprotein sitt for at det skal endre funksjon.


Bremsene i celledelings-syklus

Dersom cella treng å bremse opp progresjonen i celledelings-syklus, til dømes når det har opp-



Hovudbodskap

- Celledelings-syklus definerer dei molekylære prosessane som styrer celledeling
- Celledelings-syklus er eit angrepspunkt for biologisk retta kreftterapi
- Farmakologisk målstyring av celledelings-syklus kan auke tumorcellers sensitivitet for stråleterapi

Figur 1


Regulering av cellesyklus. Cella kopierer sitt DNA i syntesefasen (S) og deler seg i to like dotterceller i mitosefasen (M). I gapfasane (G₁ og G₂) mellom S og M blir celledelinga regulert. Denne syklusen (G₁–S–G₂–M) blir driven av syklinavhengige kinasar (cdk, cdc2) i kompleks med syklinar. DNA-skade aktiverer genomvaktarproteina p53 ved G₁-fasekontrollposten og/eller ATM ved G₂-fasekontrollposten. Dette resulterer i aktivering av cellesyklusinhibitoren p21 i G₁-fasen og inhibisjon av fosfatase cdc25C i G₂-fasen og fører til cellesyklusarrest. Piler er stimulatoriske signalvegar, mens stoppliner er inhibitoriske signalvegar. G₀-fasen representerer den cellulære tilstanden kor cella ikkje aktivt deler seg. Bokstaven P i gul sirkel symboliserer ei fosfatgruppe og illustrerer såleis ein viss fosforyleringsgrad av det aktuelle proteinet

stått DNA-skade, blir kontrollpostane i G₁- og/eller G₂-fasen aktiverte. Da blir spesifikke cellesyklusinhibitorar slått på, og desse hemmar dei syklinavhengige kinasane. Dei sentrale cellesyklusinhibitorane innan tumorbiologien er faktorane p15, p16, p21 og p27 (fig 1).

Kontrollpostane i G₁- og G₂-fasen

Når det oppstår ein DNA-skade, blir den overordna genomvaktaren, tumorsuppres-

sorproteinet p53, aktivert ved G₁-fasekontrollposten. Aktivert p53 sørger mellom anna for å slå på cellesyklusinhibitoren p21 (fig 1). Samtidig set p53 i gang DNA-reparasjon eller eventuelt den cellulære apoptoseprosessen (programmert celledød) dersom skaden er uboteleg.

Som mange vil kjenne til, er p53-proteinet ikkje-funksjonelt i eit fleirtal av humane tumorar. Men DNA-skade vil også aktivere kinasen ATM (ataxia telangiectasia mu-

tated) ved G₂-fasekontrollposten. Aktivert ATM stansar så prosessen mot mitose ved å hemme fosfatase cdc25C (fig 1). Dette prinsippet er involvert i tumorcellers respons på stråleterapi (6) og kan også manipulerast farmakologisk med det føremålet å oppnå strålesensitisering av tumorcellene (3).

Genomvaktaren ATM fungerer ikkje hos individ med den autosomalt resessive, genetiske sjukdommen ataxia telangiectasia. Desse individ har arva defekt ATM-gen frå begge foreldre og er ekstremt sensitive for all påverknad på arvestoffet. Cellene dei manglar evna til å aktivere G₂-fasekontrollposten for å gje cellene tid til å ta konsekvensen av DNA-skade (reparasjon eller celledød), og skadane kan derfor føre til mutasjonar som blir overført til neste cellegenerasjon.

Stråleterapi – terapeutisk modulering av G₂-fasen


Terapeutisk stråling, altså bruk av høgenergetiske (ioniserande) strålekvaliteter på levande vev, har som føremål å lage irreversibele DNA-skadar i raskt delande celler (tumorceller) for å destruere desse, på same måte som terapiprinsippet for mange cytostatika. I klinisk stråleterapi utnyttar vi nettopp det at tumorcellene deler seg mykje raskare enn celler i normalvevet rundt tumor. Den totale stråledosen som er nødvendig for å oppnå tumorkontroll blir delt opp (fraksjonert), vanlegvis i daglege eindosefraksjonar, for å oppnå spesifikt drap av tumorcellene samtidig som biverknadene frå normalvevet blir haldne innanfor eit klinisk akseptabelt nivå.

Viss proliferasjonsraten til tumorcellene er kritisk høg, eller biverknadene frå normalvevet blir uakseptable, kan behandlinga gjevast over eit kortare tidsrom (såkalla akselerert fraksjonering), eller med fleire daglege, men mindre fraksjonsdosar (såkalla hyperfraksjonert behandling). No har også molekylær målstyring av tumorcellenes proliferasjonsprosess (3) komme som eit framtidssretta supplement til sofistikerte fraksjoneringsregime (og andre, stråletekniske åtgjerder) for å auke den terapeutiske ratio (skilnaden) mellom tumorvev og normalvev ved klinisk stråleterapi.

Dei molekylære mekanismane som er involverte i stråleterapi dannar grunnlaget for at dette representerer ein G₂-fasespesifikk behandlingsmodalitet ved kreftsjukdom (6).

Effekt av DNA-skade ved G₂-fasekontrollposten

Når tumorcella blir eksponert for ioniserande strålar, vil det skadde DNA innan få minutt aktivere G₂-fasekontrollposten ved ATM, som er funksjonell i dei aller fleste humane tumorar. Dette vil stanse prosessen mot mitose ved å hemme fosfatase cdc25C (fig 1). For tumorcella er dette ein nyttig respons, da den på dette viset kan få tid til

Figur 2


Signalvegar som blir aktiverte etter DNA-skade i celle som er eksponert for ioniserande stråling (til venstre). Til høgre er funksjonen til den pololike kinasen (plk) ved G₂-fasekontrollposten i cellesyklus. Symbola er forklart i teksta til figur 1

å reparere DNA-skadane før den går inn i mitose.

Når ATM-kinasen er aktivert etter DNA-skade, sender den aktivitetssignalet vidare via minst to signalvegar (6, 7), som illustrert i figur 2. Enten stimulerer ATM ein kinase som heiter CHK2, som dernest direkte hemmar cdc25C-fosfatase. Alternativt kan ATM stimulere tumorsuppressorproteinet BRCA1, som dernest aktiverer ein kinase som heiter CHK1. Denne hemmar så cdc25C-fosfatase, og progresjonen gjennom G₂-fasen stansar opp.

Mange vil kjenne til at mutasjonar i BRCA1-genet er knytt til arvede bryst- og ovarialkreft (8). Hos individ som har arva eit mutert genallel frå ein av foreldra, fungerer ikkje BRCA1-tumorsuppressorproteinet lenger dersom det andre allelet også blir øydelagt. BRCA1-proteinet har ei rekke viktige funksjonar innan respons på DNA-skade, mellom anna ved å styre DNA-reparasjon og apoptose. Vi tenkjer oss derfor at ei celle som mistar sitt funksjonelle BRCA1-protein (har mutasjon i begge BRCA1-genallela) lett vil kunne transformert til ei tumorcelle.

Ny molekylær mekanisme ved strålebehandling

Vi har funne ein ny mekanisme for korleis genomvaktaren ATM kan stanse prosessen

mot mitose etter DNA-skade. Den fullstendige studien vart publisert i 2003 (9).

Vi viste at ei mammaparsinomcelleline som manglar funksjonelt BRCA1-protein fordi begge genallela er muterte (HCC1937-celleline) (10), i liten grad responderte med G₂-fasearrest etter strålebehandling. Men etter at funksjonelt BRCA1-gen var sett på plass att i HCC1937-celleline (11), stansa cellene opp i G₂-fasen som forventet (fig 3a).

Vidare observerte vi at strålebehandling hemma aktiviteten av genet som kodar for ein G₂-fasespesifikk kinase, den såkalla pololike kinasen, forut for G₂-fasearresten. Dette skjedde parallelt med at genaktiviteten av G₂-fasens syklin, syklin B, vart hemma av strålebehandlinga, noko som er kjent frå tidlegare. Funksjonelt BRCA1-protein var ein føresetnad også for desse fenomenene da strålingsindusert inhibisjon av gena for den pololike kinasen og syklin B ikkje skjedde i HCC1937-celleline (fig 3b).


Molekylærbiologiske studiar dei aller seinaste åra har vist at den pololike kinasen har ein vesentleg funksjon i den cellulære responsen på DNA-skade ved G₂-fasekontrollposten (12). Denne kinasen aktiverer cdc25C-fosfatase ved å fosforylere den (13), som illustrert i figur 2. Når så ioniserande stråling undertrykker aktiviteten av genet for den pololike kinasen, vil resultatet

bli at cdc25C i mindre grad blir fosforylert og aktivert, og det oppstår G₂-fasearrest.

Farmakologisk strålesensitisering

Som nemnt vil BRCA1 aktivere CHK1-kinasen. Vi nytta ein spesifikk CHK1-inhibitor, UCN-01, som vi fekk frå det statlege amerikanske National Cancer Institute. Denne institusjonen har eit utviklingsprogram for nye farmaka til kreftbehandling, Developmental Therapeutics Program, innan Division of Cancer Treatment and Diagnosis (14). Ved å gje tumorceller (med funksjonelt BRCA1-protein) CHK1-inhibitoren UCN-01 før strålebehandling, kunne vi hindre strålingsindusert hemming av den pololike kinasen og påfølgjande G₂-fasearrest (fig 3c, d).

Farmakologisk målstyring av BRCA1/CHK1-signalvegen kan altså, iallfall eksperimentelt, nyttast til å manipulere tumorcellenes respons på strålebehandling med det føremålet å oppnå strålesensitisering (3, 7). Når BRCA1/CHK1-signalvegen blir hemma og tumorcellene ikkje lenger kan stanse opp i G₂-fasen etter å ha vorte eksponert for ioniserande stråling, vil cellene ta med seg alle DNA-skadane ureparerte inn i mitosen. Da oppstår fenomenet mitotisk celledød, som er den dominerande mekanismen for celledød ved stråleterapi.



Figur 3 Respons på stråleterapi i G₂-fasen av cellesyklus – molekylære mekanismer. Mammaparsinomcellene HCC1937 har defekt BRCA1-konstitusjon fordi begge genallela er muterte (10). I den deriverte celleline HCC1937/BRCA1^{+/+} er funksjonelt BRCA1-gen ført inn att ved hjelp av genterapi med retrovirus (11). Som kontroll for at genterapiprosedyren i seg sjølv ikkje påverkar analyseresultatet har vi brukt HCC1937-celler kor berre retrovirusvektor (utan BRCA1-gen) er ført inn att (11). Desse cellelinene vart eksponerte for ioniserande stråling (ion. str.), eventuelt med samtidig behandling med CHK1-inhibitoren UCN-01. Symbol: – (ubestrålt/ubehandla), + (bestrålt/behandla). a) og c) viser cellesyklusprofil etter 12 timar, analysert ved væskestrømscytometri. Arealet under kvar topp på histogramma er eit uttrykk for kor stor del av det totale cellelaget som hadde DNA-innhald svarande til G₁- og G₂/M-fasane av cellesyklus. b) og d) viser mRNA-ekspresjonsnivå av cellesyklusfaktorar i G₂-fasen, analysert ved Northern blot-hybridisering. mRNA-storleik er oppgjeven i kilobase (kb). Gennomenklatur: PLK (genet for den pololike kinasen), CCNB1 (syklin B1-genet). Delfigurane a, b og d er omredigerte frå ein tidlegare publisert studie (9) og reproduisert med løyve frå Nature Publishing Group

Tabell 1 Døme på designdrogar som attakkerer cellesyklus, og som har nådd klinisk utprøving (15). Pivanex er registrert produktamn (generisk namn er halde hemmeleg) for droge produsert av Titan Pharmaceuticals, Inc. (South San Francisco, CA)

Droge	Verknadsmekanisme
R-roscovitine	Cdk2/cdc2-inhibitor
BMS-387032	Cdk2-inhibitor
Flavopiridol	Pan-cdk-inhibitor
Histon deacetylaseinhibitorar: MS-275 CI-994 SAHA-hydroksyamidsyre Pivanex	Aktiverer cellesyklus-inhibitoren p21
UCN-01	CHK1-inhibitor

CHK1-inhibitoren UCN-01 er ein av stadig fleire nye drogar som er utvikla for å attakkere spesifikt G₁- eller G₂-fasen av cellesyklus. Data frå fleire kombinasjonsstudiar med UCN-01 og standard kjemoterapi er venta i nær framtid. Derimot har ingen senter, så vidt eg kjenner til, enno sett i gang kombinasjonsstudiar med stråleterapi.

Molekylær målstyring av cellesyklus

Når det gjeld utvikling av nye drogar for molekylær målstyring av tumorcellenes proliferasjonsprosess, er det i praksis to grupper biologiske angreppspunkt den farmasøytiske industrien dei siste 2–3 åra har konsentrert utviklinga om (15) (tab 1). Den eine gruppa av drogar er spesifikke cdk-inhibitorar, altså direkte hemmarar av kinasane som driv cellesyklus framover. Både store, multinasjonale konsern og mindre farmasøytiske bedrifter, som gjerne har sprunge ut frå universitetsmiljø som har arbeidd med cellesyklus på grunnforskningsnivå, utviklar ein stadig større portefølje innan cdk-inhibitorar. Den andre gruppa farmaka er agensar som inhiberer CHK1- og/eller CHK2-signalvegane (slik den omtalte drogen UCN-01 gjer). Her er fleire større og mindre farmasøytiske bedrifter så vel som statlege institusjonar (som til dømes National Cancer Institute) tungt involverte.

Det er eit stort omfang av kliniske studiar med drogar retta mot cellesyklus som i løpet av dei aller seinaste åra er planlagt eller har starta opp. Tidlegfaseutprøving er naturleg nok oftast monoterapi, eventuelt enkle kombinasjonsregime, for å etablere drogens toksisitetnivå og kva type terapierespons det er føremålstenleg å evaluere som primært endepunkt, og pasientane som blir inkluderte har som regel avansert kreftsjukdom. Men frå ein basalbiologisk synsstad er det grunn til å tru at indikasjonane for drogar retta mot cellesyklus vil etablerast innan kliniske sjukdomsstadium kor tumorvolumet behandlinga rettar seg mot er avgrensa, og da som adjuvantia til konvensjonell kreftterapi.

Strålesensitisering via åtak på M-fasen

Oslostudien ved klinisk stadium 3 av ikkje-småcella lungekreft, i regi av Norsk Lungekreftgruppe, nyttar strategien for kombinert terapeutisk åtak på to cellesyklusfasar.

Taxanar utgjer ei av dei viktigaste nye gruppene cytostatika som vart utvikla i 1990-åra. Desse stoffa verkar ved å øydelegge mikrotubuli slik at mitosen ikkje kan fullførast. Dette er sannsynlegvis den molekylære mekanismen bak den strålesensitisierende effekten av taxanane.

Prinsippet er å administrere docetaxel, ikkje i cytotoxisk dose, men i ein lågare, strålesensitisierende dose, parallelt med strålebehandlinga (såkalla konkomitant behandling). Tumorcellene er såleis strålesensitiserte i M-fasen av cellesyklus idet fraksjonsdosen med ioniserande stråling blir applisert, noko som etter eksperimentelle modellar gjer den strålingsinduserte DNA-skaden letal ved at tumorcellene går i apoptose (16).

Håpet er sjølvstakt at denne behandlinga skal gje høgare spesifikt tumorcelledrap i både primærtumor og hilare/mediastinale lymfeknutar utan at den totale stråledosen samtidig gjev klinisk uakseptable biverknader frå eksponert normalvev. Taxanane har ei rekke dosebegrensande biverknader, som naturleg nok er mindre uttala ved lågare dosar som har eit strålesensitisierende føremål. Men docetaxel har likevel vist seg å potensierte effekten av ioniserande stråling (eller omvendt) på lungevev og myokard, med pneumonitt og kardiale leiingsforstyringar som klinisk resultat. Om effekten av auka tumor kontroll på totaloverlevinga blir eten opp av slike alvorlege biverknader, er framleis uavklart.

Konklusjon

Cellessyklus som basalbiologisk konsept er både eit utfordrande og pedagogisk engasjerande døme på korleis direkte kunnskap frå grunnforskning kan danne grunnlag for nye terapeutiske intervensjonsstrategiar innan klinisk medisin. Kontrollpostane i G₁- og G₂-fasen av cellesyklus representerer an-

greppspunkt for biologisk retta terapi ved kreftsjukdom, og ei rekke designdrogar som er vist eksperimentelt å modulere cellesyklus er under oppstart eller gjennomgår alle-reie klinisk utprøving.

Eg ønskjer å gje varm takk til mine dyktige samarbeidspartnarar, Åse Bratland, Ragnhild V. Nome og Kirsti Solberg Landsverk, som har hjelpt meg med eksperimenta som er vist i denne artikkelen. Vidare takkar eg Jon B. Reitan og Jens P. Berg for konstruktive kommentarar til manuskriptet og Kreftforeningen som finansierer forskardelen av stillinga mi ved Det norske radiumhospital HF.

Litteratur

- Johansen T, Bjørkøy G. Onkogene – «råkjørere» på signalveier som styrer celledeling. Tidsskr Nor Lægeforen 1998; 118: 1880–5.
- Lothe RA, Blomhoff HK. Tumorsuppressorer – gener og proteiner. Tidsskr Nor Lægeforen 1998; 118: 1887–92.
- Ma BBY, Bristow RG, Kim J et al. Combined-modality treatment of solid tumors using radiotherapy and molecular targeted agents. J Clin Oncol 2003; 21: 2760–76.
- Senderowicz AM. Small-molecule cyclin-dependent kinase modulators. Oncogene 2003; 22: 6609–20.
- Swanton C. Cell-cycle targeted therapies. Lancet Oncol 2004; 5: 27–36.
- Iliakis G, Wang Y, Guan J et al. DNA damage checkpoint control in cells exposed to ionizing radiation. Oncogene 2003; 22: 5834–47.
- Zhou BBS, Bartek J. Targeting the checkpoint kinases: chemosensitization versus chemoprotection. Nat Rev Cancer 2004; 4: 1–10.
- Rosen EM, Fan S, Pestell RG et al. BRCA1 gene in breast cancer. J Cell Physiol 2003; 196: 19–41.
- Ree AH, Bratland Å, Nome RV et al. Repression of mRNA for the PLK cell cycle gene after DNA damage requires BRCA1. Oncogene 2003; 22: 8952–5.
- Tomlinson GE, Chen TT, Stastny VA et al. Characterization of a breast cancer cell line derived from a germ-line BRCA1 mutation carrier. Cancer Res 1998; 58: 3237–42.
- Scully R, Ganesan S, Vlasakova K et al. Genetic analysis of BRCA1 function in a defined tumor cell line. Mol Cell 1999; 4: 1093–9.
- Dai W, Huang X, Ruan Q. Polo-like kinases in cell cycle checkpoint control. Front Biosci 2003; 8: 1128–33.
- Roshak AK, Capper EA, Imburgia C et al. The human polo-like kinase, PLK, regulates cdc2/cyclin B through phosphorylation and activation of the cdc25C phosphatase. Cell Signal 2000; 12: 405–11.
- National Cancer Institute, Division of Cancer Treatment and Diagnosis. <http://cancer.gov/dctd> (26.8.2004).
- AACR-NCI-EORTC International Conference on Molecular Targets and Cancer Therapeutics 17.–21.11.2003. www.aacr.org/2003mtct.asp (26.8.2004).
- Milas L, Milas MM, Mason KA. Combination of taxanes with radiation: preclinical studies. Semin Radiat Oncol 1999; 9: 12–26.